

# Tagna Donya

## Yang pagbaoy sang donya

**1** <sup>1</sup>Sang pukas biyaoy ng Allaho Taala yang lopa aw yang langit. <sup>2</sup>Sangaong ona waa pay paras ng donya aw waa pay lasak. Laot pa yang donya aw maduguum. Ansinyan yaparinung-rinung yang Niyawa ng Allaho Taala sang babawan ng laot.

<sup>3</sup>Ansinyan yaglaong yang Allaho Taala, “Amaon yang kaamdagan.” Mandiadi yamaon da. <sup>4</sup>Sang pagkakita ng Allaho Taala sang kaamdagan yamasowat yaan kay madyaw yang paras. Ansinyan biyain naan yang kaamdagan aw yang kaduguuman. <sup>5</sup>Yang kaamdagan yang piyagangaanan naan ng “allaw”, yang kaduguuman oman yang piyagangaanan naan ng “gabi”. Ansinyan liyomabay yang gabi aw diyomatung yang kaamdag, idto yang pukas na allaw.

<sup>6</sup>Adoon, yaglaong yang Allaho Taala, “Amaon yang pagauang sang tunga ng laot antak aon tobig sa babaw aw sa daum. <sup>7</sup>Mandiadi biyaoy ng Allaho Taala yang paguangan aw biyain naan yang laot. Adoon, yabaoy da yaan. <sup>8</sup>Yang piyagauang yang piyagangaanan ng Allaho Taala ng “langit”. Ansinyan liyomabay yang gabi aw diyomatung yang kaamdag, idto yang ikadowa na allaw.

<sup>9</sup>Adoon, yaglaong da oman yang Allaho Taala, “Magapondok yang tobig sa daum ng langit sang sambook

na tupad antak lomotaw yang magdang na lopa.” Ansinyan yabaoy da yaan. <sup>10</sup>Yang magdang na lopa yang piyagangaanan ng Allaho Taala ng “lopa”, yang piyopondok na tobig oman yang piyagangaanan naan ng “dagat”. Sang pagtanaw ng Allaho Taala sang biyaoy naan yamasowat yaan kay madyaw yang paras.

<sup>11</sup>Adoon, yaglaong yang Allaho Taala, “Motobo sang lopa yang yanagkatuna-tuna na mga tanum, magonawa ng mga tanum na aon similya kipat sang mga kaoy na mamamonga.” Ansinyan yabaoy da yaan. <sup>12</sup>Tiyomobo da sang lopa yang yanagkatuna-tuna na mga tanum: mga tanum na aon similya kipat sang mga kaoy na mamamonga na aon similya. Sang pagtanaw ng Allaho Taala sang biyaoy naan yamasowat yaan kay madyaw yang paras. <sup>13</sup>Ansinyan liyomabay yang gabi aw diyomatung yang kaamdag, idto yang ikatoo na allaw.

<sup>14</sup>Adoon, yaglaong yang Allaho Taala, “Amaon yang mga magkaamdag sang langit antak magbuag silan sang allaw sikun sang gabi. Magapakatigam oman silan sang mga allaw aw toig kipat sang mangkadakowa na mga allaw na mosonod. <sup>15</sup>Misiga silan adto sang langit antak kaamdag yang donya.” Ansinyan yabaoy da yaan. <sup>16</sup>Adoon, biyaoy ng Allaho Taala yang dowambook na mangkadakowa na mga siga: yang dakowa na siga, magonawa ng suga, na magaatag ng kaamdag ng allaw, aw yang sambook oman, magonawa ng bowan, na misiga ng gabi. Biyaoy oman naan yang mga

bituun. <sup>17</sup>Aw biyutang ng Allaho Taala yang kariko sidto sang langit antak magatag silan ng kaamdag sang donya. <sup>18</sup>Magaatiman oman silan sang allaw aw gabi kay magabuag silan sang kaamdagan aw kaduguuman. Sang pagtanaw ng Allaho Taala sang biyaoy naan yamasowat yaan kay madyaw yang paras. <sup>19</sup>Ansinyan liyomabay yang gabi aw diyomatung yang kaamdag, idto yang ikaopat na allaw.

<sup>20</sup>Adoon, yaglaong oman yang Allaho Taala, “Amapono yang dagat ng yanagkatuna-tuna na biyas ng isda aw managlayog-layog yang mga langgam adto sang langit.” <sup>21</sup>Ansinyan biyaoy ng Allaho Taala yang mangkabagas na mga isda sang dagat kipat sang yanagkatuna-tuna na mga isda na iyan sang tobig kipat oman sang yanagkatuna-tuna na mga langgam. Sang pagtanaw ng Allaho Taala sang biyaoy naan yamasowat yaan kay madyaw yang paras. <sup>22</sup>Adoon, kiyalooyan silan ng Allaho Taala aw laong naan, “Pagpakadaig kamo aw ponoa yang mga tobig aw yang dagat. Magapakadaig oman yang mga langgam sang babawan ng donya.” <sup>23</sup>Ansinyan liyomabay yang gabi aw diyomatung yang kaamdag, idto yang ikalima na allaw.

<sup>24</sup>Adoon, yaglaong oman yang Allaho Taala, “Amaon sang donya yang yanagkatuna-tuna na mga ayup, mangkabagas aw mangkayantuk, kipat sang mga yaas na ayup.” Pagkalaong naan sinyan yabaoy da yaan. <sup>25</sup>Agaw biyaoy da ng Allaho Taala yang kariko ng mga biyas ng mga

ayup. Sang pagtanaw ng Allaho Taala sang biyaoy naan yamasowat yaan kay madyaw yang paras.

<sup>26</sup>Adoon, yaglaong yang Allaho Taala, “Inangun ko yang otaw na aon kapagonawa ko aw atag ko kanaan yang kapatot makapantag sang mga isda sang dagat, makapantag sang mga langgam sang langit kipat oman makapantag sang mga ayup sang babawan ng donya.”

<sup>27</sup>Ansinyan biyaoy ng Allaho Taala yang otaw na aon kapagonawa naan. Biyaoy naan yang otaw, usug aw bobay. <sup>28</sup>Adoon, kiyalooyan silan ng Allaho Taala aw laong naan, “Pagpakadaig kamo antak mapono yang donya sang mga topo mayo aw atag ko kamayo yang kapatot makapantag sang lasak ng donya. Kamo yang magabuut sang mga isda, sang mga langgam kipat sang kariko ng mga ayup adi sang donya.”

<sup>29</sup>Pagkatapos saan yaglaong yang Allaho Taala, “Adoon atag ko kamayo yang yanagkatuna-tuna na mga tanum na aon similya kipat sang mga kaoy na mamamonga na iyan sang babawan ng donya. Ingidto yang kamayo mga pagkaan. <sup>30</sup>Sang mga ayup oman, mangkabagas aw mangkayantuk, kipat sang mga langgam atag ko yang kariko ng mga tanum antak nilan makaan.” Pagkalaong naan sinyan yamabaoy dayon yaan.

<sup>31</sup>Sang pagtanaw ng Allaho Taala sang kariko ng biyaoy naan yamasowat yaan kay madyaw yang paras. Ansinyan

liyomabay yang gabi aw diyomatung yang kaamdag, idto yang ikaunum na allaw.

**2** <sup>1</sup>Ansinyan yabaoy da yang langit aw yang lopa kipat sang mga butang na yamakalasak sang donya. <sup>2</sup>Sang ikapito na allaw yatapos da ng Allaho Taala yang kariko ng biyaoy naan aw yagpatana da yaan. <sup>3</sup>Yang ikapito na allaw ininang naan ng dakowa na allaw kay ansaan na allaw akatapos yang pagbaoy naan sang donya aw yagpatana yaan. <sup>4</sup>Yang idto yang gogodanun makapantag sang pagbaoy ng donya.

#### Yang tanumanan sang banwa ng Idin

Sangaong ona pagbaoy ng Allaho Taala sang donya <sup>5</sup>waa pay yamanobo na mga tanum sang lopa kay wa pa apaowani ng Allaho Taala aw waa pay oman magpapawa. <sup>6</sup>Awgaid maskin waa pay owan aon tobig na imibwak sikun sa suud ng lopa na yamakabasa sang lopa.

<sup>7</sup>Ansinyan kiyamang ng Allaho Taala yang abog aw piyorma naan ng otaw. Pagkatapos saan yoyopan naan ng samut sang ilong antak kaaonan ng niyawa.

<sup>8</sup>Pagkatapos saan ininang ng Allaho Taala yang sambook na tanumanan sang banwa ng Idin adto sang silatan aw ansaan adaa yang otaw na biyaoy naan. <sup>9</sup>Ansinyan piyatobo ng Allaho Taala yang yanagkatuna-tuna na mga kaoy na madyaw tanawun aw yang bonga nilan

madyaw kaanun. Sang tunga ng tanumanan aon sambook na kaoy na makaatag ng kinaboi aw sambook na kaoy na makaatag ng katigam makapantag sang madyaw aw maat.

<sup>10</sup>Aon sambook na tobig na yagasikun sang banwa ng Idin na yagaatag ng tobig sang tanumanan. Paglogwa sang tanumanan yamainang ng opat ka lawas ng tobig. <sup>11</sup>Yang pukas na tobig na tiyatawag na Pison yoboos sang banwa ng Habil. <sup>12</sup>Ansaan na banwa aon bowawan, aw madyaw na paballo kipat sang mangkamahal na mga bato. <sup>13</sup>Yang ikadowna na tobig na tiyatawag na Gihon yoboos sang banwa ng Kos. <sup>14</sup>Yang ikatoo na tobig na tiyatawag na Tigris yoboos sang kilid ng banwa ng Assiriya adto sa silatan. Yang ikaopat na tobig yang tiyatawag na Alporati.

<sup>15</sup>Ansinyan diyaa ng Allaho Taala yang inyan na otaw adto sang tanumanan ng Idin antak atimanun aw bantayan naan. <sup>16</sup>Adoon, piyagalaong yaan ng Allaho Taala, “Mapakay kaw komaan ng bonga ng kariko ng mga kaoy sang tanumanan. <sup>17</sup>Awgaid,” laong naan, “ayaw magkaan ng bonga ng kaoy na makaatag kanmo ng katigam makapantag sang madyaw aw maat. Aw makakaan kaw saan amatay kaw.”

<sup>18</sup>Adoon, yaglaong oman yang Allaho Taala, “Di amadyaw aw saida gaid naan na otaw. Inangan ko yaan ng kaupdanan na magonawa kanaan otaw na amakatabang kanaan.”

<sup>19</sup>Adoon, piyapadood ng Allaho Taala sang otaw yang kariko ng mga ayup aw langgam na biyaoy naan sikun sang

lopa antak katigaman naan daw ono yang pagangaan kanilan ninyaan na otaw. Maskin ono yang piyagangaan naan kanilan yang idto da yang pangaan nilan. <sup>20</sup>Kaynampa piyangingaan naan yang kariko ng kaayupan aw yang mga langgam kipat sang yaas na mga ayup. Awgaid waa pay kikita naan na kaupdanan na magonawa kanaan na otaw na amakatabang kanaan.

<sup>21</sup>Pagkatugun-tugun sinyan piyapakatoog ng Allaho Taala yang inyan na otaw. Sang wakto na yamakatoog ng madyaw kiyakamangan yaan ng Allaho Taala ng sambook na gosok aw piyaori da oman yang kanaan onod. <sup>22</sup>Yaan na gosok yang ininang ng Allaho Taala ng bobay aw daa yaan adto sang usug.

<sup>23</sup>Ansinyan yakapaglaong yang usug, “Yani kay yang kaupdanan ko na magonawa kanak kay yang pusa naan sikun sang kanak pusa, aw yang onod naan sikun sang kanak onod. ‘Bobay’ yang pangaan naan kay yagasikun yaan sang lawas ng usug.”

<sup>24</sup>Sabap sinyan ibiyaan ng usug yang kanaan ama aw ina kay umupud sang asawa naan kay sambook da yang lawas nilan.

<sup>25</sup>Na, ansinyan lobas silan dowa, yang usug aw yang bobay, awgaid wa silan akasipug.

### Pukas ng pagkadosa ng otaw

**3** <sup>1</sup>Adoon, yang bila yang pinakalimbongan na mananap na biyaoy ng Allaho Taala. Ansinyan yaglaong yang bila sang bobay, “Bunnaa ba na piyagalaong kamo na dili mapakay komaan ng bonga ng kariko ng mga kaoy na adi sang tanumanan?”

<sup>2</sup>Tiyomobag yang bobay, “Makakaan sa kami sang bonga ng kariko ng mga kaoy na adi sa suud ng tanumanan. <sup>3</sup>Yatabiya,” laong naan, “yang bonga ng kaoy na iyan sang tunga. Piyagasagda kanami ng Allaho Taala yaan na kaoy, na maskin yang pagtakmag. Aw komaan kami ng bonga saan na kaoyamatay kono kami.”

<sup>4</sup>“Dili! Di kamo mamatay,” laong ng bila sang bobay. <sup>5</sup>“Piyagasagda kamayo ng Allaho Taala yaan na kaoy kay yamatigam yaan na aw komaan kamo ng bonga saan na kaoy magonawa da kamo sang Allaho Taala kay akaaonan kamo ng katigam makapantag sang madyaw aw maat.”

<sup>6</sup>Pagtanaw ng bobay saan na kaoy yamakadumdum yaan na madyaw yaan tanawun aw madyaw kowaw kaanun yang bonga sinyan. Karim oman naan kaaonan ng katigam. Agaw sagaw kiyamang naan yang bonga aw kiyaan naan aw atagi oman yang kanaan bana aw kiyaan oman naan. <sup>7</sup>Yamatapos silan komaan kiyakaaonan silan ng dumduman aw yamakita nilan na lobas kadi silan. Sabap sinyan

yagainang silan ng tatapis sikun sang mga daon ng igira para pagtapis sang kanilan lawas.

<sup>8</sup>Pagkakasilum disinyan yamadungug nilan na yagapanaw-panaw yang Allaho Taala sang tanumanan. Agaw yagtago silan sang kakaoyan. <sup>9</sup>Awgaid tiyatawag ng Allaho Taala yang usug, laong naan, “Wain kaw?”

<sup>10</sup>Tiyomobag yang usug, “Yamadungug ko na yagapanaw-panaw kaw sang tanumanan. Yamalluk ako kay lobas ako. Agaw yagatago ako.”

<sup>11</sup>Yosip yaan ng Allaho Taala, “Sino yang yagalaong kanmo na lobas kaw? Yakakaan kaw kadi sang bonga ng kaoy na piyagasagda ko kanmo?”

<sup>12</sup>“Ud,” tiyomobag yang usug, “agwaid,” laong naan, “yang bobay na yatag mo kanak yaan yang yagaatag kanak ng bonga sinyan na kaoy. Agaw sagaw yakakaan ako.”

<sup>13</sup>Ansinyan yosip ng Allaho Taala yang bobay, “Nanga sa ininang mo yaan?”

Tiyomobag yang bobay, “Inilad ako ng bila. Idto sagaw, kiyomaan ako.”

### Yang siksa ng Allaho Taala

<sup>14</sup>Adoon, yaglaong yang Allaho Taala sang bila, “Sabap ng maynini yang ininang mo isiksaun ta kaw. Sang kariko ng mga ayup ikaw gaid yang isiksaun ko. Sikun adoon yang kanmo dubdub yang pagapanaw mo sang lopa aw yang abog yang amakaan mo sang tibook mo na kinaboi. <sup>15</sup>Inangun ko

kamo na kalaban, ikaw aw yang bobay, kipat sang topo mo aw yang topo ng bobay, magakakalaban silan. Yang topo ng bobay yang magagilas sang kanmo oo. Ikaw oman yang magakagat sang kanaan tabok.”

**16**Yaglaong oman yang Allaho Taala sang bobay, “Odogangan ko yang kairap mo aw yang kuduú mo sang kanmo pagpanganak. Abir pa sa maynaan, amallini kaw giapon sang kanmo bana aw yaan yang magabuut kanmo.”

**17**Yaglaong oman yang Allaho Taala sang usug, “Ikaw oman, sabap ng yosonod kaw sang piyagalaong ng kanmo asawa aw yakaan kaw sang bonga ng kaoy na piyagasadga ko kanmo agabaan yang lopa sabap sang inang mo. Sang tibook mo na kinaboi amairapan kaw maggawbuk sang lopa para sang kanmo pagpanginaboi. **18**Motobo sang lopa yang sampinit aw yang mga sagbut aw yang mga tanum yang amakaan mo. **19**Moboos yang pawis aw akapoyon kaw ng madyaw bago pa kaw atagan ng lopa ng ridski antod sang pagbarik mo sang lopa. Iyan kaw inanga sang lopa, adto kaw ori sang lopa.”

**20**Ansinyan “Awa” yang piyagangaan ni Adam sang kanaan asawa kay yaan yang ina ng kariko ng mga otaw.

**21**Ansinyan ininangan ng Allaho Taala si Adam aw yang asawa naan ng mga dagom sikun sang paris ng mga ayup aw papandagoma silan.

#### Piyapapanaw sang tanumanan si Nabi Adam aw si Sitti Awa

**22**Yaglaong oman yang Allaho Taala, “Magonawa kanak adoon yang manosiya kay aon day kanilan katigam ng madyaw aw maat. Di mapakay na makamang pa silan ng bonga ng kaoy na makaatag ng kinaboi na way kataposan aw akaanun nilan kay basin kaaonan silan ng kinaboi na way kataposan.” **23**Agaw piyapapanaw silan ng Allaho Taala sang tanumanan sang banwa ng Idin antak maggawbuk yang usug sang lopa na kanaan piyagasikunan.

**24**Pagkatapos nilan papanawun biyutang ng Allaho Taala yang mga malaikat sa silatan ng tanumanan ng Idin kipat sang ispada na yagalaga-laga aw yagatoyok-toyok. Iyan silan obutangan kay magabantay silan sang daan na pasingadto sang kaoy na makaatag ng kinaboi.

Kalagan  
Genesis

76.11-395-3.5C 14.120P-951009N  
ISBN 971-159-111-1

Printed in the Philippines  
©International Bible Society, 1995